

東
華
續
錄

東華續錄

臣王先謙

臣周馥
周馥 蕃恭校

乾隆三十七年壬辰春正月庚子諭朕稽古右文聿資治理幾餘
典學日有孜孜因思策府縹緲載籍極博其鉅者羽翼經訓垂範
方來固足稱千秋法鑒卽在識小之徒專門撰述細及名物象數
兼綜條貫各自成家亦莫不有所發明可爲游藝養心之一助是
以御極之初卽詔中外搜訪遺書並命儒臣校勘十三經二十一
史徧布貴宮嘉惠後學復開館纂修綱目三編通鑑輯覽及三通
諸書凡藝林承學之士所當戶誦家弦者旣已薈萃略備第念讀
書固在得其要領而多識前言往行以畜其德惟蒐羅益廣則研
討愈精如康熙年間所修圖書集成全部兼收並錄極方策之大

觀引用諸編率屬因類取裁勢不能悉載全文使閱者沿流溯源
一一徵其來處今內府藏書插架不爲不富然古今來著作之手
無慮數千百家或逸在名山未登柱史正宜及時採集彙送京師
以彰千古同文之盛其令直省督撫會同學政等通飭所屬加意
購訪除坊肆所售舉業詩文及民間無用之族譜尺牘屏幃壽言
等類又其人本無實學不過嫁名馳驚編刻酬唱詩文瑣碎無當
者均無庸採取外其歷代流傳舊書內有闡明理學治法關繫世
道人心者自當首先購覓至若發揮傳註攷覈典章旁暨九流百
家之言有裨實用者亦應備爲甄擇又如歷代名人洎本朝士林
宿望向有詩文專集及近時沈潛經史原本風雅如顧棟高陳祖
范任啓運沈德潛輩亦各著述成編並非勦說卮言可比均應槩
行查明在坊肆者或量爲給價家藏者卽槩令進呈其有未經鐫

刊止係鈔本存留者不妨繕錄副本仍將原書給還並嚴飭所屬一切善爲經理毋使吏胥藉端滋擾但各省蒐輯之書卷帙必多若不加之鑑別悉令呈送煩複皆所不免著該督撫等先將各書敘列目錄注係某朝某人所著書中要指何在簡明開載具摺奏聞候彙齊送令廷臣檢覈有堪備閱者再開單行知取進庶幾副在石渠用儲乙覽從此四部七略益昭美備稱朕意焉○辛丑免奉天錦州二府額徵米豆○免浙江玉環海甯兩廳額徵銀穀○免山西大同等二府額徵兵餉米豆穀麥並太原等十四府州及歸化城各屬十分之三○壬寅桂林等奏僧格宗距賊巢不遠爲赴美諾必由之路賊層列堅礮占據要隘臣等見分兵截取卡了一經得手卽籌勦此路至前繪地圖止就賊緊要處黏籤茲復詳繪呈覽再喇嘛寺西南兩面俱懸崖峭壁寺旁東向墨爾多山經

該酋封禁應飭官兵伐木縱火開清山徑寺北山後閒道險仄難行距甲木十餘里中隔郭松寨見在巴朗拉達木巴宗等處俱經攻獲雖南路兵力未裕賊當窘迫諒不能爲掩襲計因與宋元俊等籌畫密抽附近各隘兵剋期進剿得旨所見俱合機宜佇俟佳音當乘機速入擒獲逆賊也○癸卯諭楊廷璋久任封疆老成歷練前因其年逾八旬畿輔事務殷繁恐未能鉅細周到是以用爲刑部尙書見其精力尙未頽邁於部務自可從容經理乃於去年偶感風痰遽茲溘逝深堪軫惜著加恩晉贈太子太保所有應得卹典著該部察例具奏尋予祭葬諡勤愍○以崔應階爲刑部尙書嘉謨署漕運總督由江南河庫道署○乙巳諭諾穆親著來京陛見雲南巡撫員缺著李湖前往署理其貴州巡撫印務著圖思德暫行護理○諭軍機大臣等昨據彰寶奏諾穆親爲人議見才具不能

展布開拓每日惟專心於案牘簿書到任後從未一離省城卽兵制營伍亦未校閱等語所奏甚是尙嫌其入告已遲諾穆親本一拘謹之人前爲司道時尙能黽勉供職及令署理巡撫屢形竭蹶其才具自難勝封疆重寄見已令其來京陞見李湖向來辦事頗能認真自擢任黔撫以來經理諸務更屬妥協滇省地處邊圉巡撫一席較黔省尤爲緊要已有旨著李湖前往署理其貴州巡撫印務令圖思德暫護李湖接奉諭旨後可卽前赴滇省諸凡加意整飭至於該省營制當積習委靡之後尤宜時加整頓昨已降旨令巡撫將督提各標代爲巡查考察李湖到任後卽遵旨妥協辦理勿拘牽成例少存畛域之見其銅廠鹽井尤滇省要務更當實力調劑清釐李湖務益加奮勉副朕委任至意著將此傳諭知之

○溫福等奏會頭溝爲小金川後戶奉旨命與桂林酌從開道進

兵夾擊以擊賊肘查斯底葉安一帶見已攻破與未過巴朗拉時情形迥異會頭溝一路有兵擣其後戶直取底木達及布朗郭宗則美諾不能守於事有益總兵書明阿帶固原兵一千名已抵維州臣等一面咨會桂林一面行知書明阿令帶兵速赴會頭溝並令副將色倫泰領西甯兵一千徑抵沃克什一帶俟臣等攻抵美諾覓道往迎桂林其貴州兵二千陝西兵一千札知桂林令邁赴約咱接濟得旨是○丙午諭宋元俊自隨征小金川以來屢著勞績已節經加恩擢用總兵今據桂林等奏攻克卡了情形宋元俊甚爲奮勉著賞戴花翎以示獎勵都司李天佑亦甚勇往並令桂林遇有副參缺出越次奏補其餘在事出力之滿漢官弁均著查明交部議敘○戊申諭軍機大臣等據桂林奏攻克郭松甲木情形連得險隘碉卡擬卽乘勝迅擣賊巢甚爲奮勉溫福前奏斯底

葉安山口賊礮已經攻破統兵圍攻資哩諒亦計日可得從此兩路夾擊實有破竹之勢逆渠自可迅速就擒但須豫爲設法防截勿令其畏懼逃入金川又煩申討方爲妥善僧格桑就獲後卽當在軍營嚴加刑訊凌遲示眾仍傳旨曉諭使諸番休目警心共知畏懼設或澤旺此時將逆子僧格桑擒獻亦不可稍存姑息寬宥蓋小金川乃內地土司豈宜如此跳梁梗命若澤旺擒獻逆子在官兵未進之前或可原於格外今賊眾竟敢抗拒官兵顯然叛逆不但僧格桑寸磔難免卽澤旺亦應緣坐駢誅之犯或念彼向爲逆子所拘不能自主姑可貸其一死但不宜仍留小金川之地卽移之成都尙恐其信息易通久或滋生事變莫若卽將澤旺檻送進京派員沿途嚴行管束毋致疏懈至該處番眾則照黔省古州之例改作屯兵令其耕作自食不必官爲給餉養贍仍移設同知

一員駐轄之久則漸與內地編氓無異自可永除後患而自打箭
鑪至巴朗拉一路並照節次諭旨於章谷設鎮駐兵並於僧格宗
達木巴宗等處酌設副將參將而約咱等隘則量設守備帶兵駐
守使內地鎮營聯絡聲息相通且將土司地界從中隔斷是我得
控制之勢而金川弭侵伺之端方爲一勞永逸溫福等於軍務告
竣卽行妥辦籌議具奏○辛亥諭軍機大臣等溫福奏見在圍困
資哩尙未能得手賊入俱藏匿碉內施放槍礮若銳於進攻恐兵
丁或有損傷等語所見甚是資哩離賊巢甚近賊眾自必悉力守
拒官兵攻擊自不可輕率卽稍遲時日亦屬無妨今早據桂林奏
已攻得卡了東北山梁礮卡五處見在攻取達烏攻得後自可卽
攻僧格宗該處亦偏近賊巢兩路夾擊賊首自更難於抵禦計書
明阿王萬邦所帶之陝黔官兵將次可抵兩處軍營官兵續有增

添聲勢愈壯且乘此新勝銳氣自必倍加奮勇勦擊賊寨無難但
加兵嚴密攻圍絕賊水道糧道賊眾勢將自潰惟在溫福等相機
勉力爲之若僧格桑竄入金川而索諾木竟敢抗不擒獻必當移
兵申討卽令豫選之健銳火器兩營勁旅迅速起程卽或更須添
調鄰省綠營精兵亦無不可果能並滅金川實一勞永逸之計朕
亦斷不惜費昨歲已撥餉三百萬兩解往備用將來並不妨再添
撥三百萬兩見諭戶部查議另降諭旨此時部庫所積多至八千
餘萬朕每以存積太多爲嫌天地生財止有此數今較乾隆初年
已多至一半有餘朕實不欲其多聚若撥發外省公事動用稍減
盈積之數亦屬調劑之一端將此意亦令溫福等知之○癸丑建
烏嚕木齊城駐兵屯田○丙辰桂林奏督兵齊集甲木合攻噶爾
金共破大小碉十一石卡七賊逃回東山梁屯踞其甲木山後小

路賊布卡甚密不能繞越進攻見與宋元俊密商探明可繞達烏直抵僧格宗路設法分路進剿得旨欣慰覽之益當奮勇前進想續增之兵亦當至營軍勢加勁自當剋日擒獲兇渠佇待捷音也○辛酉諭軍機大臣等桂林奏十一十二兩日賊番俱繞山梁而來潛圖偷劫經官兵奮力擊敗並派兵設伏邀截所辦俱合機宜至所稱對仗時令士兵留心瞭望大半皆係金川番眾並見有金川頭人額諾等語昨據溫福奏拏獲賊犯沙拉訊係金川勒烏圖人並供金川派兵約七百餘令頭人帶領相助小金川等語是兩路軍營俱有賊兵自山梁潛來偷奪如出一轍必係金川之人暗爲指使其情甚爲可惡金川賊眾既爲小金川出力抗拒或於兩路潛派賊兵截我之後以阻臺站餉道皆不可不防今陝甘兵已據溫福奏正月十五日可至軍營而貴州兵亦據王萬邦報稱十

二月二十六日已抵成都正月二十左右可至桂林處是兩路續
添官兵聲勢甚壯正可合力夾擊擣穴擒渠並各選派勇幹弁兵
在後路嚴密防禦毋致賊人逞其伎倆最關緊要至我兵見攻之
資哩僧格宗兩路均係小金川要隘金川助惡之兵更由何路徑
赴賊巢則賊眾潛趨美諾之來蹤恐卽爲逆酋將來竄往金川之
去路不可不調問明確豫爲伏兵堵截以防僧格桑之駭走方爲
妥協至於索諾木竟敢顯然助惡更不必慮其知覺生疑此時若
仍佯爲不知轉使賊人隱爲得計自應作爲桂林之意派明幹之
人前往金川檄諭索諾木以僧格桑抗違教約侵占鄰疆及至官
兵壓境尙敢率眾抗拒罪在不赦至爾金川本係無罪之人卽與
僧格桑誼屬姻親原無緣坐之例且自爾父即卡投誠以來承受
大皇帝恩惠二十餘年今我兵攻勦小金川擒捕逆犯罪有所歸

與爾金川無涉乃昨在卡了山梁望見小金川賊眾內竟有爾金川頭人在彼率眾相助而大兵所獲賊番沙拉訖係爾金川之人並供金川派兵七百頭人二名往助小金川之語則是爾金川竟顯與小金川黨惡甚爲非是並據沙拉供爾諭頭人止令看守山梁不令與官兵打仗今看此光景爾兵既至小金川卽屬助逆是爾自謂詭狡其實至愚爾索諾木悖理妄行至此非惟無益於人並且貽害於己實爲自取罪戾本督部堂念爾父郎卡向來恭順奉法不忍遽行聲罪致討特差員弁齎檄傳諭爾索諾木奉到檄示之後若卽將派助小金川兵眾迅速撤回並將所占革布什咱之地盡行退還或僧格桑畏罪逃入金川卽行擒獻則平定小金川以後原可不波及金川仍得保守土境樂業安居爾若執迷不悟則剿滅小金川之後卽便移兵問罪見在各省精兵數萬已集

軍營並選發八旗勁旅數萬合力攻擊小金川卽爾榜揀官兵所至勦洗無遺彼時悔無及矣特爲明切檄諭利害爾自擇之如此傳檄既可使其知所儆畏並可覘其舉動若何以便相機辦理但所遣之人須擇明曉大義勇敢可任令其前往於事方爲有益如索諾木敢於抗違則勢難中止又莫若早爲籌辦桂林卽當據實具奏便可令京兵迅速起程赴川及早集事計汪鵬龍所帶之添調陝甘兵三千名二月初旬外亦可至桂林軍營足資攻勦金川之用若如桂林前此之咨令停止陝甘兵丁一節未爲得當今亦不深責也至章谷一帶旣已札致阿爾泰嚴加防範甚中肯綮其餘有似此應行防守之處並宜一體留心○壬戌諭前於乾隆三十一年丙戌科會試曾降旨分別挑選各省舉人以疏壅滯閤今已逾六載業經加恩降旨於本年春闈後照例舉行但思前次挑

選所有新中舉人不應遽行入選者止扣除切近兩科而派出之王大臣等於驗看時多取年力精壯之人是入選者仍係近科舉人爲多其科分較陳者仍致艱於與列豈朕設法疏通本意自應再爲參酌使官人造士並得其中方爲允協今計切近兩科如庚寅辛卯年分竟與本年直接卽推溯至戊子乙酉兩科距今亦不過五年七年舉子半屬年富力强所歷科分未久自會試中式以及中書學正學錄及教習膳錄等項皆可資以進身較之乾隆初年舉人覈計懸隔三十餘年者實屬相去霄壤槩予甄錄甚非情理之平此次挑選著將乙酉戊子庚寅辛卯四科舉人均行扣除王大臣等就應挑各科舉人內量其鄉科較深而人材出色可用者列入一等以備分發各省試用俾得及鋒自效無憾久淹其科深而才力不至近衰堪勝司鐸之任者卽予列入二等以教職銓

選補用俱照例引見候旨定奪其按省酌定人數俱照上屆例行此朕愛惜士子慎重官方不得已調劑之苦心在歷試場屋者既不致坐傷遲暮可以乘時報稱其初登鄉薦者亦宜安於資序本淺當知上進有階自不應希心速化於廣勵士風之道尤有裨益該部卽遵諭行○癸亥諭上年因永定河北運河等處遇夏秋雨水過多每不免於漫溢宜急籌修治宣洩之方以杜後患特派高晉裘曰修會同總督周元理履勘擬辦業允所請發帑興修見在春和冰泮正屆開工之期自應及時經理興作但此兩河應辦工段極爲繁重所派承辦之員甚多動用錢糧亦大必須逐一妥協稽覈庶工程得歸實用周元理一人耳目恐難徧及且該督有地方之責亦未必能常至河干著尙書裘曰修前往協同周元理將一應修濬工程及支銷錢糧等事董率各員妥辦實力稽查裘曰

修仍不時往來其間悉心伙助務使大工迅速告成永資恬鞏

二月丙寅諭昨據御史富爾敏奏嗣後揀發人員請照驗看月官之例派出科道一同揀發一摺所奏非是各省奏請揀發人員經朕特派大臣遴選帶領引見原係隨時辦理之事與驗看月選人員例派九卿科道者不同况驗看月官一事自朕臨御三十七年以來從未見科道等有將大臣驗看不公據實糾參者是特奉行成例難期實濟已可槩見若揀發人員已派大臣而復令科道隨班監察事出分歧既於政體未協儻因各省請發奏到交部開列科道銜名辦理徒費紆回否則科道人數眾多朕又安能一一記憶爲之從中簡派乎朕辦理庶政止期務實若此等專事空名無裨國是實所不取恐中外不喻朕意將此通諭知之○諭軍機大臣等據伍岱參奏烏什哈達馬彪不遵號令請一併革職令其效

力贖罪溫福摺內又稱烏什哈達私離汛地卽欲辦理烏什哈達
隨帶兵復往占據山峰等語伊等不遵將軍號令固不得謂之無
罪但溫福卽欲辦理烏什哈達亦覺過當烏什哈達理應看守所
占之處遣兵寄信溫福不應將兵帶回此其罪也但烏什哈達從
前已曾攻碉奪卡今棄山岡而能復行占據亦可以抵罪烏什哈
達馬彪俱著加恩革職留任令其出力自贖溫福平時口吃在朕
前奏事尙不能達其意性又頗露急躁官兵不知其如此必謂將
軍性暴兵眾難堪又因不能卽克地方中心煩躁不論地險雪深
一味催迫官兵如此辦理恐失軍心不可不戒也再行軍之道固
當嚴肅亦應審擇地勢酌量能行而後進若不惜兵力不論地之
險阻惟知勇往直前恐於軍事反無所益數年以來凡臨陣退縮
者朕必治罪然於山險雪深難於進攻之處並未嘗不愛惜官兵

惟令催促前進也伍岱阿桂皆係舊人從前皆同溫福歷練行陣
二人亦當將此情節婉勸溫福再此時書明阿張大經所帶之兵
諒已陸續將到此兵到時軍威益盛爾等其一乃心力共圖滅賊
迅奏膚功○丁卯諭阿桂著授爲參贊大臣仍加恩將伊子阿迪
斯阿彌達寬免回京○諭軍機大臣等伍岱參奏馬彪烏什哈達
摺內密奏溫福自以爲是不聽伊言以至眾兵寒心等語朕以溫
福性躁一時不能攻得資哩催促官兵前進以至眾兵寒心亦未
可定至伍岱曾從兆惠經歷西路軍營又授爲都統參贊或遂輕
視溫福又或伍岱竟有過失惟恐溫福參奏故爲先發制人之計
烏拉齊之惡習如此均未可定在將軍參贊理宜和衷共濟方可
以任事圖功今若以伍岱所參之摺卽寄溫福閱看伊必轉滋疑
惑是以伍岱所奏夾片已經焚毀但溫福在軍營實在如何舉動

未能深悉從前訥親在金川時並未親臨戰陣坐守營盤是以將伊正法今溫福日與賊人交仗豈如當日訥親安坐營中任性迫使官兵乎阿桂雖係提督然是滿洲世僕且在軍機行走多年係朕加恩棄瑕錄用溫福所行之事伍岱尙且奏及何以阿桂反不奏聞今伍岱所奏彼此有何爭競其何以不睦之故著傳諭阿桂據實密奏看來二人在一處於軍務大爲無益不如派伍岱隨往桂林隊內亦可將此一併密諭阿桂作速據實覆奏○諭據桂林奏連日攻勦噶爾金前面山梁情形並於夜間設伏擊敗偷營賊眾及躡探路徑繞越碉卡各情形所辦俱好賊番屢次乘夜潛來偷劫必係金川所爲甚爲可恨十五夜間截殺五十餘賊雖足稍挫其鋒使之警畏惜未能盡殲其眾卽此幫助小金川一節索諾木之罪已難輕追前諭桂林選派再幹之員持檄往諭斷不可少

至索諾木既與僧格桑句通一氣亦未必不防官兵之併爲勦擊固無慮此時之豫洩事機致賊酋知覺準備也見在溫福攻勦資哩已得其對面山梁所有資哩賊寨計日可破今桂林復尋覓間道進攻果能得其要隘兩路俱可乘勝直入攻勦美諾勢如破竹若卽擒獲僧格桑處以極刑則諸番自然震懾軍務卽可告蒧但恐逆酋逃入金川而索諾木竟敢負隅抗命勢不得不移兵征勦見在陝甘貴州等省續調添調之兵俱陸續到營惟覺滿洲兵太少朕意或將豫派之京兵二千卽令起程前進自爲得濟但派遣京兵卽使兼程遄進此時亦不能迅至軍營供見在攻勦之用且京兵行動聲勢甚大以此朕心尙未能遽定况用兵之事實非朕本懷不特金川險僻不欲窮兵黷武卽辦理小金川一節朕初意卽不肯加兵是以於阿爾泰格外矜原若其誤全出於阿爾泰一

人之意則與向年訥親之僨事何異是阿爾泰早經正法又豈能
僅予罷斥旋復授爲散秩大臣乎著將此詳諭溫福桂林卽將見
在情形通盤籌畫若索諾木藏匿罪首又不退還侵地不可不聲
罪致討卽當奏請京兵遄往合力勦擊俟伊等覆奏到日以定行
止○戊辰諭據徐績奏軍犯李作良自配逃回利津原籍經該犯
之父李海赴縣首稟例應如罪人自首免罪但該犯屢犯竊案在
配又不安分殊屬玩法仍擬斬決等語此等軍犯逃回原籍自屬
怙過不悛之徒本無足惜但見經伊父首稟於律既有如罪人自
首免罪之條自可量從末減李作良著從寬免死仍發原配地方
嗣後有似此者俱照此例行但因首告而貸死已屬法外之仁止
可一次若到配後仍不知懲艾復敢脫逃雖有父兄等再爲首告
亦不准其寬減於情法更爲允協著爲令○諭軍機大臣等伍岱

密奏摺內有溫福自以爲是不聽伊言頗寒官兵之心等語朕謂將軍參贊在營辦事必彼此一心方於軍務有益今閱伍岱所奏則已露彼此不睦之意朕已將其摺片焚毀並降旨詢問阿桂然朕徹夜思維儻溫福知之轉生疑懼論溫福伍岱阿桂三人朕自信用溫福無反信伍岱阿桂之理卽前日溫福等奏摺遞到朕先爲閱看因其辦理烏什哈達頗爲過當朕卽以過當批之後始閱伍岱奏摺非因伍岱之言也總因溫福平素口吃性又急躁一時不能卽破資哩其心更增煩躁所以急欲嚴辦烏什哈達由此可以想見其性情矣然溫福身任勦賊其煩躁固宜卽伍岱阿桂亦豈有不煩躁之理此尙非溫福之過其曲自在伍岱若使溫福亦如當日訥親在軍營時偷安退縮從不一至接仗之地但知嚴促兵丁進攻則不但伍岱應行參奏卽阿桂亦當聲明其故一同參

奏朕昨日密寄阿桂諭旨竟不必機密卽令溫福伍岱阿桂同看
或果係溫福性暴蔑視伍岱致寒將士之心溫福卽當改悔從前
之失朕意伍岱在軍營較之溫福更多歷練或因一時不能取資
哩恐溫福委罪於伊乃以此密奏爲先發制人之計其欲自占地
步已屬顯然著溫福伍岱阿桂據實奏聞朕辦理庶務一秉至公
從無偏倚如此反復申諭者正以伊等皆受朕重恩且當軍旅要
務若彼此生釁必至誤朕大事至於此等瑣細朕亦不加深究著
傳諭伊等各自屏去嫌疑合心共濟速冀勦滅逆酋以慰懸望○
己巳 上御經筵○壬申諭軍機大臣等諾穆親奏滇省銅廠有
應行查辦之事已派侍郎袁守侗馳驛前往雲南會同該署撫李
湖秉公查審據奏到單內有布政使錢度第三子起程及藩幕某
姓行二回浙之語二人係案內應行質訊之人著薩載富勒渾卽

於各原籍密行查明迅委妥員押赴滇省質審仍行具摺覆奏將
此由四百里諭令知之○甲戌 上啓鑾幸盤山○桂林奏賊屯
踞噶爾金後山梁經臣密派備弁帶兵潛由甲木下溝進攻復飭
侍衛將領等分領兵伏噶爾金山下聞槍接應夾擊殲賊六十四
奪大小石卡四十餘復攻破邦科碉卡殲賊十五取碉房石卡二
十餘餘賊潰竄樹林被東山梁賊救應上山東山梁陡險碉卡有
金川番眾屯守若徒於此仰攻恐稽時日因與鎮將等一面攻東
山梁一面設法度河襲隔岸阿仰地方並派弁兵裹糧從噶爾金
後山梁赴墨壘溝山嶺潛進覓路直抵達烏得旨一切皆合機宜
佇俟大捷喜音○乙亥諭軍機大臣等今日閱溫福阿桂奏摺不
列伍岱之銜朕疑伍岱接仗時或有挫失及細閱摺內則仍有伍
岱之名前因伍岱單銜奏事朕謂將軍參贊彼此不和必因伍岱

自恃軍營歷練又以朕用爲都統參贊遂先狂妄或因溫福目無
伍岱至於不睦已降旨令伊等據實覆奏矣今觀此奏是非關伍
岱之故必溫福阿桂以伍岱是烏拉齊人因藐視之夫朕用伍岱
原以其久歷軍營欲其於行閒出力至於信任大臣以圖集事豈
有舍溫福阿桂反信伍岱之理溫福阿桂皆係滿洲世僕且爲朕
任用舊人若如此居心是其識見與伍岱相等數年以來朕留心
察看將軍大臣往往如是夫朕任用一人將軍等卽當體朕之心
諸事含容冀服其心而得其力豈宜好生枝節轉開罅隙之端溫
福見任將軍且加恩至大學士更應度量含宏隨材器使使人心
翕服將士效命不應居心如此著傳諭令其改悔以收羣策之益

○丁丑 上駐蹕盤山○己卯桂林奏督兵攻東山梁賊憑高固
守對面阿仰地方賊人沿河設卡兵亦難暗渡因令總兵宋元俊

王萬邦等仍力攻山梁派參將薛琮等領川練兵二千令土兵引路分兩路一由甲木翻山一由新得噶爾金後山梁繞道俱潛赴墨壘溝山嶺繞出東山梁後從上壓取比到齊時賊於山脊要路憑木城石卡堅守麾兵奮擊占據大木城四石卡二十一殲賊四十六追至半山兩峰壁立徑險僅容一人賊據守山卡兵傷難進因令薛琮等帶兵暫屯仍飭上緊設法攻開取道直抵達烏得旨自當督飭官兵鼓勇向前亦應愛惜兵力勉爲之一切佇候捷音

○癸未溫福等奏接奉諭旨以見勦之資哩僧格宗俱小金川要隘金川兵由何路赴賊巢命確訪伏兵豫堵查兩金川境壤相連據脫出沃克什之番民章喀爾等供僧格宗南半日程爲來章寨來章南一日程爲金川所屬克舟九寨克舟距噶拉依不遠金川兵從克舟至來章從來章至僧格宗再抵美諾各該處均在美諾

西南官兵經過處在美諾東北俟攻得美諾訪明各境分兵嚴防
報聞○甲申諭刑部侍郎員缺著吳壇補授吳紹詩著調補吏部
侍郎袁守侗著調補刑部侍郎吳壇未到任之先吳紹詩仍著辦
理刑部事務俟吳壇到任後吳紹詩再赴吏部辦事袁守侗見在
出差所有刑部侍郎事務著閻循琦暫行兼署○調增福爲江蘇
布政使以楊魁爲安徽布政使璫琦爲安徽按察使由禮道遷○乙酉
免江蘇蘇州等屬逋賦○丙戌 上還京師○諭軍機大臣等桂
林奏分兵先復革布什咱一摺所見亦是索諾木黨惡幫兵其情
甚爲可惡將來之果否獻兇退地尙不可知與其籌辦於事後自
不若豫發於幾先此時分兵直擊革布什咱使之猝不及防盡取
其地既可懾索諾木之膽令其稍知儆懼兼可絕賊首要求之心
且革布什咱旣得與章谷聲勢相連我卡了官兵後路糧餉軍臺

均可保無他慮而索諾木見幫小金川之兵若聞我攻取革布什
咱之信自不暇復顧他人必將撤兵自衛金川兵一撤價格桑失
其所恃各隘踞守必懈官兵乘閒進攻自更易於得手溫福等可
留心偵訪一聞金川撤兵之信卽加意攻擊自屬極好機會如此
尤爲一舉兩得况見在所攻之東山梁及墨壘溝一帶地勢險仄
不能容集多人官兵在彼徒爲閒住則分兵往襲革布什咱更可
及鋒而用於振勵士氣亦爲有益但恐綠營積習因見見在攻剿
山隘稍難思另攻得新地以爲掩抵而於應行急剿之要隘轉致
稍懈於事甚有關繫桂林不可不知今汪騰龍已到軍營自應同
桂林由價格宗一路進剿迅期掃穴擒渠而令宋元俊統兵收復
革布什咱方爲妥協至所稱滿洲勁旅實遠勝綠營但番地跬步
皆山非平地對仗可比云云此必桂林見成都滿洲兵無用又未

深知健銳營之兵所向無敵實爲得力故有此言今京兵且不起程俟溫福奏到時再行定止但溫福處尙有能帶兵之滿洲侍衛等而桂林處見在無人已令明亮及派出帶兵之侍衛十六人由驛馳赴桂林軍營隨同進剿卽用以督率綠營亦屬得力總期剋日奏功至所請再調貴州兵三千名已飛諭署撫圖思德提督拜凌阿卽行選派聽候川省調取速卽起程○丁亥諭色布騰巴勒珠爾著授爲參贊大臣同豐昇額由驛前往四川軍營查辦伍岱案件○諭軍機大臣等溫福奏伍岱種種任性乖謬妄行著派御前大臣公豐昇額參贊大臣固倫額駙色布騰巴勒珠爾前往軍營將所降諭旨至溫福處當面曉諭並詢問伍岱此等情事如果屬實卽革去參贊大臣作爲兵丁自備資斧效力○阿桂奏溫福性本急躁又因剿賊未卽成功督率言語未免過嚴侍衛將弁等

雖懷畏懼不至寒軍士之心待伍岱亦無藐視形迹伍岱雖久經戰陣但不曉大體性好猜防至參奏馬彪烏什哈達並未送臣會銜臣意以爲不應參奏故未列名報聞○戊子諭副都統富勒渾著加恩賞銀一百兩無庸請訓明日卽馳驛追及派往四川軍營見已起程之護軍校巴克青阿等一路約束前往到彼後著溫福等酌量令其領隊行走○諭軍機大臣等據圖思德奏審擬歐韻清焚索苗民一案已批交該部速議矣至另摺奏稱李湖前此詢出勒索情由未將該管道員龔學海指參不免意存迴護等語所奏甚當此案前據彰寶查奏時朕卽知李湖必因曾經保留龔學海之故礙於顏面不卽將案內情節專摺參奏當卽一面傳諭圖思德秉公查審一面令李湖明白回奏至李湖奏到亦僅以曾於巡查營伍摺內牽連綴及數語爲辭其迴護之迹究亦不能自掩

已經節次批諭今閱圖思德之奏果不出朕所料李湖歷任司道辦事頗爲實心乃朕所深知之人是以擢用巡撫卽其保留龔學海一節亦曾降旨嘉予敘錄至歐韻清滋事不法關係苗疆雖前此曾著微勞業已賞銜獎勵豈可因此曲爲寬縱致令擾累苗民該管官不加究治原屬不合但其獲咎亦不至甚大李湖若卽據實查辦加參道廳等亦止照常議處與該撫保留顏面無關何必過爲顧慮此事殊不類李湖平日所爲至今案情畢露在李湖亦將無以自解但李湖係朕特加識拔在巡撫中尙屬得力之人朕豈肯因一眚輒加廢斥而其過失則不可不令其自知著將圖思德原摺鈔寄李湖閱看嗣後務宜益加策勵力矢誠懇以期永遠承受朕恩至龔學海亦朕所稔知前此已屬棄瑕復用嗣因辦理香要一案頗爲能事特由同知超擢道員昨歲因公議處復加恩

從寬留任尤當感激報效此案龔學海設有受賄徇庇情弊非特不能保其功名卽立寘之法亦不爲過今所得止係失察處分至重亦不過革職留任而止但此後亦當引以自戒著圖思德將朕此旨詳悉傳諭龔學海令其益加儆惕實力奮勉於苗疆一切事宜妥協經理毋稍懈怠若有賄徇姑息之事則罪由自取不能復爲曲貸矣將此一併詳諭知之○己丑諭軍機大臣等據富勒渾奏海塘潮水大勢自正月望汛以後分溜漸偏北面漲沙而行見在飭屬於西口門內外加緊開溝挖寬俾經中壘引河暢行無滯等語浙省海潮溜水趨向靡常朕兩次親臨閱視令將海甯一帶柴塘坦水加意培修用資防護至尖山等處漲沙形勢惟令較原勘箋誌按月報聞驗其消長深知潮汛遷移乃其壅吸自然之勢非可以人力相爭施工於無用之地也邇年漸欲循赴中壘固

爲可喜今復改趨向北亦其溜偏使然惟當於北岸塘工勤加相
度修繕俾無衝齧之虞瀕海田廬藉其保障方爲切實要務若開
挖引河雖亦尋常補苴之策而當溜趨沙激豈能力挽回瀾正恐
挑港鑿沙徒勞無益况浙潮靈奇非他處可比必有神默司其契
豈宜強施人事妄與爭衡富勒渾止當實力保衛隄塘以待潮汐
之自循舊軌不必執意急爲開溝引溜之計必欲以人力勝海潮
也將此傳諭知之○以王太岳爲雲南布政使韋謙恆爲雲南按

察使

由翰林院侍讀學士遷

○癸巳戶部等部奏乾隆三十五年軍機大臣

會同吏戶兵三部奏准革職離任人員內奉旨賞職銜頂帶者准
照原官降一等捐復前議雖遵成規但該廢員等既經邀恩似無
庸限以降捐之例請將例得捐復文武人員賞原銜者照官捐復
願降捐者聽降等賞銜者內或願捐復原官准聲敘案由結呈戶

部移吏兵二部覈明合例者文職州縣以上武職衛千總以上傳令取結赴部各該部札開履歷案由帶領引見 欽定奉旨准捐原官者各照原銜捐復未經引見及引見不准捐復原官者仍照降等銜報捐願遞降者聽其例不引見人員賞降等銜願捐復原官者由戶部咨送吏兵二部覈明合例者移咨戶部辦理知照到日彙題從之○乙未免陝西西安等十二府州上年額徵本色租糧

三月丙申朔免江蘇金壇等十一州縣六年至十年逋賦○戊戌和親王永璧薨諭和碩和親王薨逝遣皇四子前往奠醑仍加恩賞給內庫銀三千兩辦理喪事所有應得卹典著該衙門察例具奏尋子祭葬諡曰勤○己亥 上親耕藉田○壬寅諭軍機大臣等圖思德奏錢度家人張林願安管送箱籠赴滇帶有金玉器什

該省截留將該家人解滇查辦等語此事殊堪駭異錢度係停給養廉之人何得有金器四百餘兩計值銀數約在四五千兩以上苟非焚索屬員取自暮夜安能有此其爲貪贓敗檢已可槩見著將原摺清單鈔寄彰寶李瑚卽將錢度嚴行審訊務得確實情節迅卽從重定擬由驛奏聞袁守伺此時自己至雲南亦著會同查辦將此並諭知之○乙巳以豐昇額爲四川軍營參贊大臣○丙午調敦福爲湖南按察使以王綬爲陝西按察使由福建興泉永道遷○丁未諭軍機大臣等富勒渾奏報海塘沙水情形一摺以新舊兩圖比較上月南門外有漲沙一片此次全行刷去且相距不過一月而形勢不同若此可見海潮來往靡定非人力所能爭前此富勒渾欲開引河一道意圖分導其徒勞無益曾爲明白切諭今潮勢旣已趨北疊則北岸隄防自關緊要隨時加意查勘葺護毋使稍

有疏虞此則所當盡力者至南岸蕭山一帶前歲熊學鵬奏請改建石塘朕以自古南岸無塘且該處偶被風潮事非常有不應攸北岸魚鱗坦水之規恐於事無濟徒爲奸胥墨吏中飽開銷因不允所請昨召見侍郎周煌偶詢及海塘之事據奏南塘自井亭至蘆葦河又自蘆葦河至富家池兩工沙地去海甚近爲最險自富家池至長山頭土塘爲次險其意亦以爲宜建石塘朕以浙海向本無塘自吳越王錢鏐因建都臨安始築錢塘捍衛其後遂相沿修繕墊石日增藉爲北岸保障亦因海潮大勢趨北時多不得不倍加防護耳至南岸向係土塘自古及今未聞其時有衝齧且水勢所趨貴於因勢順導若亦束以石塘使其勢不能游衍自非所宜卽如直隸之永定河兩岸築隄議者尙有築牆遏水之論况海溝鼓盪噓吸不可端倪者乎朕於關繫民生之事雖數百萬帑金

亦所不惜正恐徒事更張行之無益而有損不得不加慎重耳若
以爲塘身距海甚近不可不豫爲籌備亦正未必盡然蓋潮趨南
臺則蕭山一帶必當其衝然數百年來豈無一趨南岸之時未聞
蕭山一帶受其害也或潮由中臺慮與南岸尙近則乾隆十六年
朕南巡時海潮正由中小臺彼時南岸之塘去海遠近若何見在
海潮趨北臺中臺尙未至何慮及蕭山乎著富勒渾卽行查明據
實具奏周煌又稱石塘之說非倡自地方官乃該處民人自願捐
修赴省具呈果爾又不當過於拘泥小民如果灼見利弊所在欲
圖自衛原可聽從其便亦如民開隄堰陂塘隨宜築治果屬輿情
利便有司自不當抑遏不從朕亦斷不因有前旨稍存成見也著
富勒渾一併確查據實覆奏○庚戌桂林奏革布什咱已遵旨令
宋元俊帶兵前往收復臣仍統將弁等由噶爾金一路進攻再攻

革布什咱須由約咱章谷一帶取道若該處全復不必回原路卽從革布什咱連界之布拉克底雪山等處直趨達烏僧格宗與臣等見攻東山梁墨爾多山嶺兵中途可合已密飭宋元俊復革布什咱後分兵由閒道抄合夾攻報聞○王子諭桂林奏攻復革布什咱之木巴拉博租薩瑪多堅藏布覺等處共得地方七十餘里收復碉寨甚多招撫番民甚眾等語金川逆酋索諾木敢於侵占革布什咱地方且敢幫助小金川抗拒官兵其情甚爲可惡不特革布什咱係內地土司本應克復卽金川之狼狽爲奸黨惡不法亦當並爲剿滅不得謂之輕開邊釁也此次桂林分遣將備剋期攻復殲殺番眾兵氣奮揚足禡索諾木之魄辦理甚屬可嘉桂林宋元俊及在事將備人等均著交部議敘○甲寅 上閱健銳營兵○乙卯諭溫福等奏攻克資哩賊寨殺賊甚多見在攻圍阿喀

木雅等語溫福阿桂調度有方將領等亦能奮勉出力從此軍聲益振自可乘勝迅擄賊巢速擒逆豎深爲嘉予溫福阿桂及在事之侍衛將弁等均著交部議敘○諭軍機大臣等桂林籌辦革布什咱一事甚爲妥速昨已交部議敘桂林於前歲冬閒由按察使陞見朕看其人尙明白且知係鶴年之子昨歲春閒遇有戶部侍郎缺出特加恩擢用並著在軍機處行走俾得留心學習至伊奉差赴川時行走不過半年從前又未充當軍機章京並非若溫福阿桂之曾經練習軍務而自擢任總督以來措置悉爲妥協近日不肯坐待專攻墨壘溝而分兵收復革布什咱先發制人攻其無備尤合機宜朕以無意中用之不意其出息竟能如此深爲喜慰桂林惟當益加奮勉以受朕恩眷辦事之道與學問無異不日進則日退桂林若因朕屢次嘉獎稍存自滿之念則非朕所期望於

彼者矣至見已攻得革布什咱之木巴拉博租薩瑪多堅藏布覺各寨其餘所侵革布什咱之地自亦無難收復然既有此舉動則金川總在不能歇手之中想索諾木此時未必卽作準備或可分兵直取金川出其不意卽將索諾木擒獲則剿擒小金川逆首更屬易事况今派有明亮往桂林軍營於帶兵更爲得力設或急切不能進攻金川而桂林統兵由布拉克底雪山一帶直取達烏僧格宗彼處無賊守險自是最好且係僧格桑竄往金川之路所必經並可沿途邀截更不慮其狡脫尤爲一舉兩得但進兵之地距金川甚近恐索諾木或派賊番斷我軍行後路餉道此則甚有關繫不可不防雖桂林昨奏令宋元俊星赴墨資溝堵截金川救兵並令陳定國往約韓斯甲布占奪甲爾壘壘以阻金川要路籌備固屬周到但番地山蹊僻境處處相通豈能信其必無他路潛越

而土司心懷兩端者多卽如布拉克底昨歲雖曾出力收復明正
土司但近日會聞其有差人往小金川之語亦不可不留心密爲
防範總期動出萬全方爲妥善至於行軍機要本無定形朕於六
七千里外豈能一一懸揣桂林惟當隨機籌度見何情形卽作何
妥辦朕惟專盼捷音矣將此由六百里加緊傳諭知之○丁巳諭
軍機大臣等據海明奏德化縣知縣擊獲錢度家人王壽等八人
查出銀二萬九千餘兩並錢度親筆家信有趙王壽回南寄歸二
數好爲收貯或作地窖或作夾壁以作永久之計等語批閱實堪
駭異錢度在布政使任內計三四年不給養廉前經黔省查出金
玉器什約值銀四五千兩以上已出情理之外茲王壽等帶回寄
家銀兩復至二萬九千之多若非婪索多賊安得有如許積聚必
係慮事將發覺遂遣人寄歸蓄積埋藏以圖三窟之計且縱子售

賣玉器數復盈萬並其家人亦私蓄銀六百餘兩是其賊私狼藉已非一日初不意錢度之負恩敗檢竟至於此可見營私貪黷之人實爲天理所不容今因朱一深揭報一節其贓蹟自然敗露正所謂天網恢恢近來辦理各省貪婪之案必徹底嚴究按法創懲以期綱紀肅清常謂司道大員必不致復有簠簋不飭之事不料仍有肆意婪贓盈千累萬如錢度之甚者實可痛恨若不嚴審究擬如官常國憲何彰實見駐永目未能親身審辦著傳諭袁守侗李湖卽傳朕旨嚴訊錢度問伊任藩司亦非甚久卽支食廉俸撙節盈餘伊旣獲罪革職留任數年不給養廉之人因何積有金銀如許實係婪得何人其欲埋藏地窖夾壁是何肺腑務令其逐一據實供出儻伊狡展不認卽嚴加刑訊亦不足惜伊子錢鄭等攜貨售賣多贓均屬可惡於沿途盤獲解到時亦著一併嚴審至其

家人王壽既爲錢度父子攜帶銀兩必係親信知情之人卽爲案內緊要人犯並著嚴刑訊鞫務得實情至錢度之事雖由朱一深揭報而發今既查出贓私累累則伊自有應得重罪卽當另案辦理不必俟朱一深全案審明一併完結再錢度名下尙有應行分賠之項今既有銀數萬兩不行交納反爲肥藥之計卽此一端更屬罪不容追著傳諭袁守侗李湖逐一嚴訊明確卽行從重定擬速奏所有錢度應賠銀兩若干前已完過若干並著李湖查明一併具奏至錢度罪重萬無可貸自應嚴加看守明正典刑若伊自知斷難倖免或致畏罪自戕惟於李湖是問將此由六百里發往傳諭知之○諭桂林奏克復革布什咱之吉地官寨及默資溝地方並據溫福等奏攻得阿克木雅情形辦理俱好但金川所侵革布什咱之地既漸次爲我收復索諾木聞之自未必遽肯甘心退

讓今默資溝雖已占據阻其應援而甲爾壘壩又豫約綽斯甲布
派兵堵截自不慮索諾木之復來爭奪但所收革布什咱地方若
駐兵鎮守最多亦不過四五百名按汛分派爲數更少將來大兵
既撤不能保逆酋之不復出而滋事今宋元俊所統兵練甚多莫
若趁賊人防守未定之時出其不意乘勝直搗其巢並將索諾木
擒獲果能將金川翦除其餘各土司更自畏威守法方爲一勞永
逸桂林當酌量該處情形隨機妥辦總以動出萬全爲要至另摺
所奏墨壘溝山嶺一帶擬將槍礮暫緩施放飭令各兵密於巖洞
藏伏賊番防禦久疲見此心必疏懈我兵即可乘機奪隘所辦甚
合機宜亦屬出奇制勝之策其溫福所奏分兵攻勦普爾瑪美美
卡水蘭壩等處自當乘勢進攻務期速得至於西路賊人拒守資
哩堅碕已閱數月忽爾棄碕奔潰及退至阿喀木雅正當死守而

我兵一至卽張皇驚竄因係官兵勢盛賊眾力難再支或金川已知收復革布什咱之信將所幫賊兵撤回自衛小金川人心惶懼不復能悉力抗拒皆屬情理所有但賊詭譎多端或因官兵深入暫避勇銳之鋒將賊眾撤避另由閒道抄襲我後以阻餉道軍臺於事甚有關繫溫福當加意慎防不可稍有疏懈官兵旣已深入後路聯絡策應尤爲緊要溫福更當時刻留心隨宜布置朕亦不能於六七千里外一一悉爲懸揣也著傳諭溫福桂林並令汪騰龍鐵保知之○庚申諭福德見在出差理藩院侍郎事務著刑部侍郎鄂寶署理其刑部侍郎員缺著雅德署理雅德未到京之前刑部侍郎事務仍著鄂寶兼辦俟雅德到任後鄂寶卽專辦理藩院事務瓦爾達著調補盛京工部侍郎並兼管順天府尹其倉場侍郎員缺著申保補授○辛酉諭軍機大臣等福康安來京陛見

朕問及舒赫德據奏形容消瘦頗露年邁光景舒赫德身本單弱今伊家口已去伊父之事諒已聞知此雖人子理宜傷感但伊父年老今既如此亦無可奈何舒赫德當自排遣以朕事爲要著賞寄荷包四箇令伊加意調養以期與朕出力○甲子諭軍機大臣等桂林奏攻得扎寨哇崖下礮卡情形設法調度深合機宜不意其竟能如此實嘉慰出於望外至所奏攻復革布什咱之沙冲黨哩亦俱妥速今宋元俊督兵攻圍丹東並分兵攻取覺拉喇嘛寺據稱務於日內全行收復剋期竣事其意似以收復革布什咱後卽併力小金川迅爲埽穴擒渠便可完局此於善後之計尙未爲周妥索諾木敢於黨惡不法實屬野性難馴若不一併剿除終難保無後患且既將所侵革布什咱之地盡行攻得又戮其留駐賊番索諾木豈肯甘心不思報復不能不駐兵防守但大兵旣撤之

後革布什咱一處不便仍駐重兵備索諾木出而爭奪少有損失
又復成何事體自不若乘此僻力勦定金川將索諾木兄弟槩行
擒獲方爲一勞永逸之計溫福桂林務當通盤籌畫相機妥辦以
期永靖邊圉○溫福等奏接奉諭旨以前奏金川及梭磨兩稟經
章嘉呼圖克圖譯其文義不甚相合命將莎羅奔及扎勒達克是
一是二明晰具奏遵卽詰訊通曉番語兼能漢話之格特布及各
通事據稱莎羅奔扎勒達克皆非人名番人稱出家爲莎羅奔謂
掌管印信爲扎勒達克至索諾木不於稟內列名因承襲土司未
給內地號紙註定名字故不於稟內稱名但以掌管印信爲詞其
嫁僧格桑者乃索諾木之姊報聞

夏四月丙寅朔諭桂林等奏分兵四路連日攻得阿仰東山梁墨
壘溝達烏各地方是處爲賊聚要門戶峻險異常桂林調度深合

機宜鼓勵將兵得此要地實屬可嘉在事之將領弁兵並著交部從優議敘○諭軍機大臣等桂林等奏設法進取分路奮攻調度甚合機宜將領弁兵等亦俱奮勇出力深爲欣慰已有旨交部從優議敘矣桂林從未經歷軍務乃能籌辦妥協若此特賞御用玉韉以示嘉獎鐵保汪騰龍亦各賞荷包一對益當加意奮勉迅成大功其將弁等出力攻殲殺賊者著桂林將備賞花翎分別賞戴其中如有勇往超眾不拘滿洲綠營並奏聞賞給巴圖魯號俾將士等並知鼓勵王萬邦英泰亦著賞戴花翎桂林旣已攻得墨壘溝達烏一帶險要見在進攻僧格宗賊番甫經受創心膽皆驚自必望風而靡官兵即可乘勝直入迅擒賊巢擒獲逆豎剋期蕪事但僧格宗爲小金川咽喉恐賊眾捨死固守該處賊寨較大或尙須多兵分剿俟全得革布什咱後卽令宋元俊回至僧格宗協同

進攻若僧格桑礪卡易於攻破不須宋元俊之相助卽無庸急於調回朕意革布什咱若經全得其地已與金川相近此時索諾木似尙未能多爲準備宋元俊見統兵練亦不爲少或竟出其不意乘勝直進扼金川噶拉依之險官兵將來進剿尤爲得力果能如此則宋元俊之功不小但亦須審度萬全不可不惜兵眾冒昧輕進此等行軍機要朕亦不能懸斷著桂林與宋元俊迅速札商就該處實在情形熟籌妥辦○諭據海明奏截拏錢度幕友葉士元帶有銀二萬餘兩見將葉士元及家人解滇質審等語實堪駭異前經海明查獲錢度父子寄回銀至三萬餘兩伊係數年不給養廉之人焉有如許積蓄其爲婪贓顯然已有旨諭該侍郎等嚴行審辦今截獲其幕友復帶有銀二萬餘兩葉士元在滇作幕所得脩金據供每年不過八百兩卽使託人營運豈能積至二萬餘金

看來竟係賓主串合通同婪索實出情理之外深爲可惡著傳諭
袁守侗李湖於該犯解到時卽行嚴加刑訊與錢度父子逐一隔
別嚴鞠務得實情按法究擬毋任其狡展將此由四百里傳諭知
之○免甘肅積年民欠○丁卯諭今日全魁於覆請折本事件全
不記憶甚屬不堪著革去內閣學士在乾清門當差○壬申諭軍
機大臣等桂林奏續又攻得格烏巴桑那隆三處見在覓閒進攻
僧格宗所辦甚好此時兵氣益揚惟盼擒渠掃穴速得捷音至另
摺奏報革布什咱之地全行收復辦理頗爲迅速惜所籌未能妥
合前遣陳定國往綽斯甲布調令發兵占據甲爾壘壩該酋業已
發兵今旣盡得革布什咱之地正當乘勝進勦金川攻其無備乃
宋元俊飭令綽斯甲布番兵暫駐界上聽候調遣失此極好機會
甚爲可惜蓋宋元俊見革布什咱全行收復其意已足遂不復計

及金川尙不免扭於緣營習氣使宋元俊卽乘官兵新勝之銳徑擣金川據彼噶拉依諸險其功績爲何如朕賞功之典又當何如惜乎所辦僅止於此此次全行收復革布什咱本應予以優敘因此一失功過止可相抵矣又摺內稱該地當人心初定自應於要隘之處駐守官兵以資防範等語桂林所見亦誤革布什咱之地久爲金川侵占今經官兵收復節次殲其防守番眾甚多又殺其頭人三名索諾木豈有不知况聞索諾木已將幫助小金川之賊兵撤回必係知官兵復其侵地懼而自防尤當乘其未備之時出其不意先發制人今宋元俊辦理既錯桂林卽應就近申飭不當聽其坐守觀望桂林在軍營節次所辦事務悉能妥合惟此一節則不免於失算至索諾木從前敢於占據革布什咱已與僧格桑占據沃克什之罪無異且又潛發賊兵幫助小金川更屬黨惡不

法即使僧格桑就擒金川之事亦難歇手與其待彼置兇拒命再
爲擒勦何如及此時豫辦之爲省力乎朕非必欲窮兵黷武但就
見在情勢而論大兵旣撤之後豈能保索諾木之日久不出滋事
是此賊不除終爲番地之患不可不籌一勞永逸之策以靖邊圉
今旣有可乘之勢昨又傳諭文綬備調兵三千名兵力不爲不厚
豈可稍事因循仍貽後患耶溫福桂林惟當竭力相機妥辦勿止
圍擒獲僧格桑便思完事○參贊大臣色布騰巴勒珠爾等奏臣
等嚴訊伍岱據供前此副將色倫泰陣亡因總兵馬彪所領官兵
並不遵照撥給而烏什哈達亦不遵派委是以自行具摺參奏自
去歲十一月十三日進攻巴朗拉乘夜打仗緣營官兵鼓譟退回
非我畏難不進又旣得巴朗拉以後日隆宗賊番先行逃遁並未
敢妄報殺賊得功至前在成都起程沿途更換驛馬有道員查禮

監放未嘗搶馬帶至軍營等語復傳集在伍岱隊內之侍衛官員
隔別研究眾供俱屬相符請將伍岱革職留於軍營自備資斧效
力贖罪諭軍機大臣等色布騰巴勒珠爾豐昇額辦理此事甚爲
錯謬摺內但將無關緊要之事審實數款其有關緊要者如伍岱
參奏溫福僅圖安逸並不親身打仗致有失機如果屬實則罪在
溫福若無此事卽係伍岱居心奸險自占地步事之有無皆軍營
官兵共見共聞有何難於剖白何以伊等皆未詳悉詢問卽或溫
福誣奏伍岱伊等亦當並參溫福勘取兩造合詞定案不可徒就
一面之供作爲證據再如伍岱奪取驛馬之事伍岱不肯認承卽
當詢明更換何驛之馬提同質審斷無不得實情之理若止將跟
隨伍岱之侍衛官員密訊伊等許告伍岱卽係許告自己且旁無
證見自不肯承凡事務得實情斷不可以顛預了事著傳諭色布

騰巴勒珠爾豐昇額另取兩造供詞其中孰是孰非之處務再逐一審明具奏○乙亥寶授李瑚雲南巡撫圖思德貴州巡撫○丁

丑諭諾穆親著加恩作爲頭等侍衛前往烏什換圍桑阿來京諾

穆親至彼自備資斧辦理領隊大臣事務○以景福爲盛京工部

侍郎

由左副都御史遷

○己卯諭軍機大臣等前據江西盤獲錢度父子

寄回銀約三萬金並查出親筆家信有令伊子埋藏地窖夾壁之

語則其原籍必更有詭祕藏匿賊私等事因令高晉薩載嚴行查

辦今據該督等奏於伊江甯家內搜出埋藏銀二萬六千餘兩又

查獲金子二千兩亦係埋藏聞擊寄頓合計又值銀二萬餘兩不

意錢度竟敢於負恩狼藉至於此極實出情理之外伊乃數年不

食養廉之人安得有如許積蓄而通覈金銀各項多至八九萬兩

實係從何處婪得不可不嚴加刑訊徹底根究毋任稍有狡展至

伊子錢鄮不特在滇婪索多賊深爲可惡並據高晉等訊出錢鄮近在常德定原任定遠縣知縣陳長鈞之女爲妾並聞伊設計哄騙致墮術中卽此喪心敗行亦非人類是錢度父子情罪均極重大恐外間尙未能盡得實情著傳諭袁守侗李湖卽將錢度錢鄮迅速嚴行審訊明確定擬具奏一面將伊父子遴委妥員小心隔別管押解送來京承審或有不實不盡經朕另行訊出惟袁守侗等是問途次或有疏虞致令畏懼自戕則袁守侗李湖獲罪不小伊二人豈不復思見朕耶將此旨由六百里發往傳諭知之高晉等原摺並鈔寄閱看○以蔡應彪爲貴州布政使由按察使遷○庚辰諭軍機大臣等溫福等奏南北兩山打仗情形及索諾木澤旺使人稟話伊等酌量曉諭等語看來阿桂處殺賊甚多所辦甚屬奮勉溫福雖亦攻勦未能痛殲賊番此必伊處略覺費手然亦當設

法前進以冀成功至伊等曉諭索諾木來使令將僧格桑獻出已屬錯誤且又賞給段匹其誤尤甚索諾木未助惡之前以是語曉諭尙可今同惡相濟已屬顯然又何可佯爲不知與之言語乎再逆酋所使之人未必實爲索諾木所使或僧格桑使其冒稱索諾木均未可定儻係僧格桑所使伊豈肯卽行遵諭卽使索諾木遵檄縛獻則索諾木轉爲有功之人將來金川之事辦乎不辦此等賊匪狡詐百出斷不可信今雖力竭計窮籲求免死豈能保其永遠不復反乎總之事已至此務將索諾木一併擒獲兩金川地方全行平定方可永除邊患再索諾木澤旺聞知色布騰巴勒珠爾豐昇額一至軍營卽使人來賊中因何得信甚速或試探消息或實來請安均未可定溫福必當留心不可墮其狡計再索諾木稟內有掌管佛教之語看來此等番人狡而信佛色布騰巴勒珠爾

本係蒙古若因賊匪崇尚佛教略爲姑息是卽爲其愚弄朕令伊等前往原爲滅賊安邊並非令其將就完結豈可徒爲草率之局乎○調韋謙恆爲貴州按察使以圖桑阿爲雲南按察使

由鹽道遷○

壬午軍機大臣等議准陝甘總督文綬奏安西道移駐巴里坤改爲屯田糧務兵備道照舊兼轄哈密關展烏魯木齊等處其原轄之安西府請就近改歸甘肅道管轄該道更名安肅兵備道至安西府一缺仍移駐淵泉縣甘州府一缺就近改歸涼莊道統轄該道更名爲甘涼兵備道所有巴里坤道同城既有滿兵且統轄哈密等處時有清文事件而所轄丞倅又俱滿缺應請將巴里坤道於陝甘兩省滿員內揀調其烏魯木齊糧道係屬差缺今糧務已歸巴里坤道兼轄此缺請裁從之○戊子諭鄂寶著調補理藩院侍郎其刑部侍郎員缺卽著雅德補授雅德未到任之先仍著鄂

寶兼署○諭瑪興阿見在出差刑部侍郎員缺著緯克托調補所

遣兵部侍郎員缺著期成額補授期成額未到任之先著慶桂兼

署○庚寅賜金榜等一百六十三人進士及第出身有差○癸巳

以喀爾崇義爲內閣學士高樸爲左副都御史

俱由給事中選

○甲午諭

軍機大臣等桂林等奏攻勦達烏東岸山梁及閒道襲取甲爾木

等處帶兵人員閒有陣亡自以籌畫未能周密請交部嚴加治罪

此可不必桂林自統兵攻勦以來屢次克捷故官兵倍加鼓勇行

軍之道豈能常得便宜卽小失亦不足異斷不可因此氣沮致生

畏怯惟當益勵銳氣切齒逆酋急圖殲滅爲陣亡諸人報仇方不

愧統兵之任至所奏陝甘續調之三千兵與南路相近見在咨商

溫福就近調赴軍營等語此項兵丁前經溫福奏請撥赴西路備

用今桂林旣因需兵接濟調往南路溫福處再爲撥補已諭令文

殺將陝甘豫備之三千兵卽派員帶領赴川矣又桂林奏果洲一帶山溝四月初有連日雨雪之事此必賊番扎答所致其法在番地川之頗效然亦可用扎答阻回見在派善用扎答之三齊拉布薩哈勒索丕二人令翼長富瑚章京扎勒桑帶領馳驛分往溫福桂林軍營備用該處番人及紅教喇嘛內多有習其術者著溫福桂林留心訪覓精通扎答之人隨營聽用使賊番技無所施此次進攻碉寨對仗時多係金川賊眾且聞僧格桑將我兵未經攻獲之地許給金川甚爲可惡溫福等前將索諾木差人賞賚遣回尤爲錯謬索諾木敢於黨惡梗命其人來至軍營必係探聽我軍虛實否則係僧格桑詭計託言金川所使以售其奸皆不可知自應留而不遣嚴刑訊鞠令其供吐實情或可稍得賊中要領豈宜仍行放回轉藉以安定番心實爲失算溫福等或因此一節進攻

稍懈則誤事更爲不淺嗣後如有賊番差來須拘禁營中嚴加刑訊務得實供並派妥員解京聽候審問勿再如前貽誤

五月乙未朔溫福奏色布騰巴勒珠爾聽信員外郎明德之言總以招致賊人爲是臣勸阻不聽原議剋日攻取阿喀木雅南北山梁今官兵意中皆謂賊番不久卽降自三月二十九日修卡後至今未修亦未攻奪至伍岱聞色布騰巴勒珠爾前往審訊豫遣人迎接到營審訊卽欲將伍岱開脫因臣在旁遂交明德辦理伍岱明德倚仗色布騰巴勒珠爾之勢朋比爲奸陷臣於罪難逃洞鑒諭軍機大臣等溫福奏色布騰巴勒珠爾種種妄行不可仍在軍營著將伍岱鎖拏卽交色布騰巴勒珠爾同軍機章京明德押解來京其帶去章京等仍留軍營隨隊進兵又諭色布騰巴勒珠爾人本糊塗因其屢次懇赴軍營向亦練習軍務遂令代爲參贊猶

諄切教誡冀其自知改勉不意到軍營後不思協力勦賊偏袒伍岱據其一面之詞苛求溫福欲加之罪以致進勦事宜月餘延緩其乖張貽誤之罪實無可追色布騰巴勒珠爾所有爵位職任著俱革退並將明德革職鎖拏解京訊究至所奏溫福在軍營如實有欺罔之處或未過巴朗拉而捏稱已過未得資哩而詭稱已得其罪自無可辭卽朕亦不肯廢法曲貸乃所指不過分改十二人供詞及資哩非由攻得兩節均屬毛舉細故况番人新濟古勒原係擒到活口訊明正法其餘十一人俱有姓名首級或當初未及鞠訊卽予駢誅補寫供詞本亦無關輕重至溫福奏得資哩原摺亦稱賊人露有奔逃形迹因得其碉寨並未捏報打仗殲戮之事覈其節次所奏溫福並未涉欺本無可加之罪至於行軍要領惟功罪大端不容稍有欺偽而批覽軍書躬親籌畫亦斷不能逃朕

之洞鑒若細微節目略爲粉飾乃軍營所常有朕亦不過於吹求
朕賞罰一秉大公諸臣果能忠誠爲國朕酬勳從重眾所共知溫
福亦當感激思奮督勵將士竭力進攻擒獲逆豎仍與桂林商辦
進剿金川事宜和衷共濟迅奏膚功○丙申諭色布騰巴勒珠爾
聽明德之言偏護伍岱欲陷溫福致誤國家軍旅大事豈尋常貽
誤可比色布騰巴勒珠爾所有職任已盡革退但念伊前在軍營
尙屬出力著加恩令伊子鄂勒哲依特穆爾額爾克巴拜承襲貝
勒其明德伍岱一併解赴熱河交軍機大臣嚴審定擬具奏○諭
侍郎鄂寶派往四川一帶有應辦事件著卽馳驛前往所有隨帶
司員景祿著一併馳驛○免直隸滄州等十五州縣應積年民欠
○辛丑諭軍機大臣等哈國興在滇見無緊要事件而此時官兵
進討小金川正需大員統率著哈國興馳驛前赴溫福軍營毋稍

濡遲○諭舒常永平均著授爲領隊大臣前赴四川軍營舒常派赴西路永平派赴南路○諭軍機大臣等阿爾泰等奏桂林在軍營乖張捏飾各情形實出意想之外已派福隆安馳驛前往查審並諭阿桂迅往南路辦理進兵之事矣福隆安未到之前仍令桂林辦理阿桂不可豫有洩漏但據奏桂林毫無定見一切機宜恐不能措置恰當見在進剿小金川甚關緊要阿爾泰受朕厚恩且係舊時總督軍營之事本無可諉其卡了及章谷一帶有應派兵防守者急須妥辦經理以防賊番抄截至攻剿僧格宗一路尤應相機速辦阿爾泰不可推諉因循致滋歧誤至所奏兵心憤怒恐致變生於事更有關係昨從後山進攻官兵失利人情未免驚惶阿爾泰務須處以鎮靜隨宜調劑勵眾心而弭事釁又諭阿爾泰奏桂林各款如修屋居住終日酣飲歡聚及聞官兵覆沒毫無惻

憫之心已非情理所有至密令汪騰龍交銀王萬邦贖取小金川所遮官兵一節尤爲大謬果如所言則桂林之罪更重阿爾泰人素老成所奏當不虛妄且其事關係甚大非若色布騰巴勒珠爾等之偏袒伍岱構摺細故劾奏溫福可置不問者比一經審實桂林卽當從重治罪見在進剿機宜甚關緊要阿爾泰年力已衰且平日未諳軍旅帶兵進剿不可無專主之人因思溫福一路阿桂之外尙有豐昇額爲參贊著傳諭阿桂速赴南路統兵若阿桂先到成都卽在彼候福隆安到時同往若福隆安已過成都阿桂速赴軍營毋稍刻緩桂林自簡用總督以來屢次克挫朕不料其出息若此喜出望外今阿爾泰奏到情節又不料其荒唐若此可駭亦出意外而官兵傷亡過多金川罪無可赦索諾木之必當併剿更不容緩昨溫福一路爲色布騰巴勒珠爾等所耽誤方冀桂林

進攻僧格宗先能得手今又不足恃朕實深爲憤懣溫福當迅速
進攻立擒逆豎○壬寅諭軍機大臣等溫福等奏到脫出沃克什
番民錫喇布供稱聞得南路大兵由西山進兵欲截小金川甲爾
木後路不意金川之兵潛從後路抄出將官兵截在中間圍困七
日傷壞甚多其數目傳說不一等語是桂林派往西山進攻之兵
傷損甚多桂林寬爾隱諱不奏實爲可駭行軍接仗傷亡亦所不
免設所傷無多稍有粉飾猶屬軍營偶有是以前次降旨桂林因
侍衛等陣亡自行請罪尙予寬免若竟至二三千眾全軍覆沒則
關係甚大乃亦匿不上聞是因懼罪而轉涉於欺致令死事者泯
滅無由邀卹良心何在卽此一節桂林之罪已爲不小至官兵被
圍七日爲時甚久桂林若於薛琮初次告急時發兵策應何至失
挫若此乃竟視同膜外以致官兵無援陷歿問之桂林尙能置喙

乎至向小金川贖回被搶之人損國威而長賊志尤爲乖謬又修屋居住亦無此理督兵進剿自當以前進爲期從前訥親在軍營卽以偷安正法桂林豈未聞知試問桂林朕待訥親多年恩眷較之桂林新加擢用者何如訥親以大學士兼公爵較彼新進之初任總督又何如實不意其自蹈罪戾若此至其狂妄驕縱羣聚歡飲不見將佐等事皆其器小易盈無福受恩所致反爲小節矣以上各情節福隆安審實後卽可按律從重定擬將桂林拏問交阿爾泰嚴加看守其總督印務卽傳旨交阿爾泰署理進兵之事卽交阿桂專辦福隆安具摺奏聞不必守候批示卽赴行在復命務於七月二十日前後到熱河昨因審案重大不得不令其前往但福隆安承管之事甚多而土爾扈特郡王巴木巴爾等到熱河時並須親近大臣照料福隆安不便久離朕前諒福隆安亦所深知

也設或阿爾泰所奏全虛西山損兵不過數百而張大其事妄報三千及交銀贖人一節毫無影響並廢銀之拉塔爾亦屬子虛則是宋元俊構詞誣陷自當奏明請旨另辦但就錫喇布供詞官兵傷損過多之說已有端倪其餘諒亦不妄未必是非顛倒大相懸絕至於如此也○命戶部侍郎福康安軍機處行走○癸卯諭軍機大臣等彰寶奏稱將海蘭察鄂蘭等分作兩隊回京川省見在用戶海蘭察等會歷軍營從漢前往自屬近便著鄂蘭帶領長生保綏庫阿坦保利保住赴南路軍營海蘭察帶領額爾登布塞布騰庫伯赴西路軍營分道進行務期奮勉自效○丙午諭前據桂林奏報官兵進攻疊壘山侍衛六十一等陣亡一摺於兵丁傷損情形並未明言卽疑其中必有含糊捏飾當經傳旨詢問嗣據阿爾泰參奏桂林派往北山進攻所失將備兵丁甚多桂林竟隱諱

不奏且復措置乖張修屋居住終日酣飲歡聚聞官兵被陷毫無
 惻隱之心甚至密令汪騰龍交銀王萬邦贖取陷賊兵丁其事尤
 堪駭異似此失律欺罔情罪重大實出情理之外已派福隆安馳
 驛迅往查辦一經審實卽當從重治罪今日據宋元俊奏桂林自
 此次失利之後並未與賊人接仗一切應辦事宜不置可否以致
 軍營無所稟承又索諾木投遞夷稟送回把總李朝林桂林卽行
 札屬宋元俊不必聲張致生議論看來桂林始因進兵挫衄毫無
 策應及軍中節次告急並不速爲救援遂爾坐視失機茫然失措
 惟知堅持掩覆之計不恤喪心罔上自蹈重罪豈復意料所及見
 在軍務關係緊要福隆安到彼尙需時日未便久延阿爾泰著卽
 行署理四川總督一面傳旨將桂林革職鎖鑰嚴行看守候審至
 南路帶兵進剿之事昨已令阿桂星馳赴彼接辦到時卽行統率

官兵實心妥辦剋期集事朕於諸臣功罪從不稍設成心況軍務大事信賞必罰所關尤鉅如桂林自抵軍營節次調度合宜屢經破礪收寨著有成績朕方降旨亟加優獎實不料其器小易盈荒唐謬戾一至於斯是桂林前以甫經任用之人既不意其驟能出息如此而今之天奪其魄無福承受恩澤遂爾本心頓失重誤軍機則亦罪由自取初非朕之所能逆覩又豈朕之所能曲貸耶朕實不勝憤懣慚愧將此通諭中外知之○丁未諭軍機大臣等閱阿爾泰原奏從前由卡丁攻取達烏時宋元俊曾將各路險易情形具稟桂林並不省視致臨時號令不一官兵傷亡六百餘名賴陳定國從山後抄截始得達烏等語因檢閱桂林等奏攻得達烏一指止云兵練均各奮勉出力亦且傷損無多並云傷亡官兵查明照例辦理並未奏及六百名之數已屬心存欺飾又據稱桂林

派侍衛章京同薛琮從墨壘溝山後進發約定親至前敵山梁接應夾攻乃桂林與鐵保汪騰龍於初八日至彼略一進攻卽行退守十二日並將明亮鐵保汪騰龍撤回是其節節貽誤之處均不可不加窮究至明亮等係帶兵大員攻勦乃其專責因何略攻卽退並聽桂林撤回鐵保本一無能爲之人汪騰龍亦深染綠營浮滑惡習此二人原不足恃至明亮平日尙知勇往任事世臣勦親尤當以國事爲念乃亦不顧軍務緊要惟憑桂林指揮與鐵保汪騰龍等旅進旅退且見桂林乖張欺罔並不臚實密奏隨同隱忍是誠何心以上各情節著福隆安逐一研訊毋任絲毫遁飾至汪騰龍以提督總兵進勦見桂林如此乖謬亦不據實參奏豈可復庸專閭著卽解任候審哈國興雖不免綠營習氣其帶兵行走尙知出力昨已諭其迅速赴溫福軍營聽用所有西安提督員缺卽

著哈國興補授○甲寅諭軍機大臣等桂林奏稱三雜谷情願出兵隨同進剿小金川自當聽溫福酌辦至該處爲進攻曾頭溝正路距布朗郭宗及底木達不遠其地係逆酋之父澤旺所居且其妻亦曾潛往自當一併剿除屢經諭令阿桂分兵往辦總因軍營之兵不敷分調而止今既有此機會而後調之陝甘兵三千又已起程見復催調哈國興迅赴西路軍營或令哈國興或令董天弼卽帶陝甘續到之兵並督率三雜谷土兵由曾頭溝一路徑取布朗郭宗底木達似爲妥便若果攻得此兩處並擒澤旺及逆酋眷屬於進剿機宜亦甚有益著傳諭溫福卽速悉心籌畫○丙辰諭袁守侗等查辦錢度貪婪不法一案審出錢度遇藩庫支放銀兩每百兩扣平餘銀一錢七八分不等計前後放過銀二千二百餘萬共扣平四萬餘兩其支放時係家人掌平隨時帶進等語錢度

身爲藩司支放庫銀竟敢扣平如許之多可見天理難容自然敗
露藩庫放銀雖不經督撫抽驗而積久扣剋豈竟毫無見聞滇省
既有此等情弊各直省藩司恐亦難保其必無著傳諭各督撫將
該省藩司如何支放有無扣收餘平及家人掌平之事卽行查明
據實覆奏毋得稍有瞻徇諱飾自干咎戾將此遇有奏事之便傳
諭知之○己未 上奉 皇太后啓鑒秋獮木蘭○免經過地方

本年額賦十分之三○甲子諭湖廣總督富明安歷任封疆老成
勤慎方資倚畀今聞偶患痰喘遽爾溘逝深爲軫惻著加贈太子
太保所有應得卹典仍著該部察例具奏尋予祭葬諡恭恪○以
海明爲湖廣總督海成爲江西巡撫國泰爲山東布政使孫廷槐
爲山東按察使

由運河
道遷

六月乙丑朔

上奉

皇太后駐蹕避暑山莊○諭溫福等奏攻

克東瑪賊寨豐昇額馬彪調度頗協機宜俱著交部議敘在事侍衛將弁等亦皆奮勇立功並著查明咨部議敘其兵丁等量加賞賚以示鼓勵又諭豐昇額等帶兵圍突槍石攻取東瑪官兵如此奮勉出力則色爾渠美美卡等處不久俱可攻克朕惟佇望捷音又據溫福奏富勒渾等帶兵奪獲數碉並據山絕頂向下攻取木蘭壩富勒渾著賞戴孔雀翎仍俟攻得木蘭壩加恩議敘○諭阿桂奏三雜谷暨綽斯甲布皆願出兵助剿金川見在查明籌辦等語所見甚是前已有旨令由曾頭溝一路督率三雜谷土兵直取底木達布朗郭宗擒拏澤旺及逆酋之妻以斷小金川後路並諭令宋元俊同侍衛等統兵赴綽斯甲布率領該土司兵練直剿金川以掣賊酋之勢阿桂尙未接奉前旨而所奏適與朕合但曾頭溝一路因調哈國興赴川令其順道帶兵並令董天弼同辦今思

哈國興自滇入川尙需時日見在三雜谷旣願出兵效力機宜不容刻緩著專派董天弼往彼統兵董天弼於番地情形熟悉且自去歲革職以來在軍營尙知改悔奮勉昨已加恩賞補副將今見出有和邦額重慶鎮總兵員缺卽著董天弼補授溫福可傳諭董天弼益當實心感奮勉期集事以贖前愆而勵後效至宋元俊前往綽斯甲布之處阿桂到營後卽與福隆安阿爾泰會同商酌揀派侍衛章京並酌選兵丁若干令其迅速帶領馳往妥辦庶幾出其不意成功尤速○庚午諭軍機大臣等據舒赫德奏稱淘金奎屯河與巴木巴爾等處游牧相近且一百二十名兵每年淘得之金較種地所收糧食迥少可否將奎屯呼圖畢河二處淘金之兵全行撤回之處請旨等語此項兵丁原爲屯田而設伊等旣不善於淘金且轉誤屯田正事今旣試淘不利自應全行撤回仍令屯

田但金乃天地自然之利果所產豐盛聽民淘取官兵於十倍之內或抽一二分於事尙屬有益若出產減少任民淘取不加管束不免生事莫如嚴禁槩不准淘有私淘者一經拏獲盡行入官著傳諭舒赫德巴圖濟爾噶勒索諾木策凌巴彥弼等將見在奎屯呼圖畢河淘金兵撤回仍令屯田外此二處所產之金或應令民人淘取官爲抽分或應嚴禁不准淘取之處伊等妥議具奏惟期於事有益不得見利而貽害也○壬申諭軍機大臣等宋元俊奏駕馭各土司所見頗爲合理是以前據阿桂等奏綽斯甲布情願出兵助力卽諭宋元俊帶兵前往督率綽斯甲布土兵進剿其三雜谷願出兵二千五百名隨剿底木達布朗郭宗亦諭令董天弼帶兵往剿矣但至今並無進兵實信乃稱請調湖南湖北近山營分之兵再於山西甘肅兵內撥給數千共得二萬之數分路進攻

等語未免過涉張皇見在綽斯甲布進攻原係牽制金川之勢使其掣兵自衛以便乘閒攻取小金川俟小金川平定後再併力會剿金川此時難以兼辦也且計節次調赴川省之兵貴州已有八千陝甘已一萬七千加以豫備之五千覈計共及三萬合之本省綠營及土兵之數不爲不多況番地跬步皆山調往之兵跋涉不易至於險隘處所仄徑單行雖多兵亦無從施展而所云七月內齊集軍營之說更恐遠道不能如期全至著傳諭福隆安會同阿爾泰阿桂將該處情形通盤籌畫並問宋元俊詳悉覈計是否必須添兵接濟覈實酌議以期萬妥又前此金川用兵共調兵六萬二千五百餘名計覈銷銀七百十二萬七千餘兩見在軍營約存軍需銀三百五十餘萬自當敷用將來尙須添撥亦卽據實先行奏聞以便籌辦又諭總兵宋元俊看來尙能辦事且熟悉番地情

形伊亦尙有心奮勉若用之有方可期得力但其人似乎狡猾好事究難深信若使過於得志難保其不滋驕縱務須留心駕馭方爲有益著寄信阿桂惟當量能取力勿令知覺留心鈐束○庚辰諭富勒渾自抵軍營犒殺賊諸凡奮勉今忽病故深堪軫惜著照烏三泰之例加恩議卹仍俟伊子服滿之日帶領引見○壬午諭據李瀚奏請停編審造冊一摺所見甚是已批交該部議奏矣第思編審人丁舊例原因生齒繁滋恐有漏戶避差之弊是以每屆五年查編造冊以備考覈今丁銀旣皆攤入地糧而滋生人戶又欽遵康熙五十二年 皇祖恩旨永不加賦則五年編審不過沿襲虛文無裨實政況各省民數細數俱經該督撫於年底專摺奏報戶部覈實具題付之史館紀載是戶口之歲增繁盛俱可按籍而稽更無藉五年一次之另行查辦徒滋紛擾此摺毋庸交議

嗣後編審之例著永行停止將此通諭各督撫知之○甲申調文
綬爲四川總督海明爲陝甘總督以阿爾泰署湖廣總督○尙書
公福隆安奏臣馳抵卡了軍營傳集桂林汪騰龍王萬邦等隔別
研訊先將阿爾泰宋元俊參奏桂林乖張捏飾各款逐一訊問據
桂林供攻取達烏並未傷損六百餘人至墨壘溝失事一節因傷
亡及迷失官兵數目不及詳查是以於摺內聲明另行咨部軍營
內遇有會議都統提督等偶爾留飯並無歡飲之事南路買賣稀
少酌量購買食物從內地送至軍營給發價值並未勒派供應至
詰以宋元俊另摺所奏脫出之把總李朝林帶有遊擊甯祿稟帖
何以屬令不許聲張據供甯祿係滿洲遊擊大員見其隱忍偷生
實爲切齒但官兵失挫恐聲張有亂眾心又詰以交銀五百兩令
贖取兵丁一節堅稱並無其事詢之宋元俊據稱於四月二十一

日自革布什咱同營至汪承需處據言金川搶掠兵丁傳說有送出邀賞之語令汪騰龍將銀五百兩交王萬邦酌辦恐其不能料理宋元俊隨往見總督稟明此乃損威失體斷不可行總督不答亦卽辭出據王萬邦供汪騰龍差土兵拉塔爾送銀五百兩書信一封內云金川情願將人送出邀賞如果送出可將此銀酌賞迨後二日金川並無動靜遂告汪騰龍將銀取回並寫書告知宋元俊等語又據汪騰龍供王萬邦差人來稱金川送出官兵一名要求賞賜隨見桂林面述桂林言可卽遣令回去次日送銀五百兩令轉送與王萬邦酌賞隔二三日桂林又令將銀取回臣思汪騰龍將金川送出官兵之故面告桂林其時桂林並無賞銀之說何以忽爾差交銀兩所差何人傳何言語再四窮詰汪騰龍始供係汪承需差人交來當卽詢問汪承需供是時據知州曹焜同知林

僞告言聞我兵有迷失在各處山溝巴旺布拉克底之人可以找尋但願賞賜並言可於糧務處借銀五百兩應用汪承霈告知桂林遂向糧務處取銀送往及閱數日汪騰龍言巴旺等番人不能往尋遂將此銀取回隨詢之曹焜等所供均同又提取糧務處號簿內載四月十七日支銀五百兩並註明發回字樣臣思此種銀兩詢據各供未能脗合恐其中思爲桂林開脫者或以贖銀爲賞銀或以賞銀金川爲賞巴旺布拉克底而思構陷桂林者又或過甚其辭均未可定必須嚴加訊鞠務得實情始足以成信讞論軍機大臣等福隆安查審桂林一案桂林一聞賊人抄襲後路之信既令宋元俊迅速救援並非膜視不顧此必宋元俊既奉總督派令救援未能卽往以致官兵失挫其罪不小懼爲桂林所劾先發制人亦與伍岱之密奏溫福無異但宋元俊心更陰險故假手阿

爾秦思得潛售其術耳惟是見在正當集兵進剿宋元俊又熟悉番情邊務爲軍營得力之人非伍岱之去留無關輕重者可比所有案內情節此時且不必向其窮究並須設法駕馭令仍鼓舞自勵統俟軍務告竣總覈功罪再行定奪如其功績不能相抵再爲詰辦著傳諭福隆安體朕此意密爲妥協辦理至所稱據宋元俊送到甯祿稟帖桂林以甯祿身係滿洲且爲遊擊大員見其隱忍偷生實爲切齒彼時正當官兵失挫之後令不必聲張以安眾心等語桂林見有手札爲宋元俊呈奏此乃桂林事後遁飾之詞不足爲信至於用銀贖人一款尤爲最重情節乃桂林供稱並無賞給銀兩之說而汪承霈則供認出自其意殊屬可疑必係桂林揣此一節罪爲最重豫屬汪承霈代認試思汪承霈係隨往司員軍務非其承辦卽兵丁迷失不出與伊何涉而必欲代籌懸賞覓回

之計其事尤爲顯而易見至宋元俊稱係用銀向金川贖回而汪承需則稱係令巴旺布拉克底土兵覓回給賞各執一說情節懸殊或係汪承需代爲擔當冀滅其罪抑係宋元俊意圖陷害過甚其詞皆未可定不可不徹底根究此時宋元俊固不必向其窮詰而汪騰龍等見俱在案無難質訊確情以成信讞也○乙酉諭軍機大臣等據彰寶奏緬匪大頭目得魯蘊差其親信緬子孟矣等四人到關稱得魯蘊自阿瓦差到老官屯辦送貢禮並送還內地之人請限六月初十日親自來見見將孟矣等看守在營至期酌辦等因一摺已於摺內批示緬地水土惡劣非人力所能施是以早經定議不欲於瘴癘之鄉復勞師旅非若兩金川以內地土司負嵎逆命必應勦除者可比如果懜駁誠心悔過送還內地之人納貢求降原可允其所請將就完事但必須將楊重英蘇爾相及

有可稽考之官員聚行送回方成事體其餘弁兵被留後存歿未
定卽有缺少尙屬無關輕重若得魯蘊實係親身款關納貢送還
之人又能如式卽可許其投誠奏聞請旨定奪不必復將來人拘
留惟受降如受敵亦不可不加意防範至於貿易之事緬酋如果
恭順亦可仍弛邊禁但貨物出入必須官爲經理如恰克圖之例
立法稽覈毋許私通仍當嚴飭關隘加緊盤詰不得容游手奸民
藉名負販涸出滋事此又善後章程之不可不留心者設或得魯
蘊止齎貢物而來或送還者不過無足比數之兵目則又不當輕
允卽以彰寶之意諭之云爾緬酋梗化多年輒敢將內地官員屢
次羈留獲罪甚重爾緬酋如自知畏罪改悔將被留官員全行送
還本督部尙可鑒爾誠惻代爲懇求大皇帝格外寬宥若止此微
末兵目豈得妄稱送人且天朝何物蔑有豈屑爾茈萋貢禮此等

詭譎安能輕爲嘗試卽將貢物擲還叱而不納若得魯蘊親至軍營亦並留之否則仍將孟矣等四人繫而不遣各種機宜惟在彰寶隨時審酌妥協辦理又非朕所能一一遙爲指示也至哈國興旣見有需辦之事不妨暫緩起程俟此事辦妥卽馳驛迅赴四川西路軍營協力進剿此旨著由六百里加緊發往傳諭知之將辦理情形若何卽速覆奏○丙戌諭阿爾泰年力衰邁於封疆重寄究非所宜卽湖廣恐亦難勝任著仍以散秩大臣留於川省南路軍營專辦糧運事務所有湖廣總督員缺仍著海明補授其陝甘總督員缺卽著勒爾謹署理富勒渾著調補陝西巡撫其浙江巡撫員缺著熊學鵬署理俟服闋之日再行實授○諭福隆安奏查審桂林案內發銀交王萬邦向金川贖回兵丁一款均係宋元俊指使不但心迹陰險兼且行同無賴甚至有恐令帶兵前進去則

必同薛琮不去則羅參劾之語真是喪盡天良昨以宋元俊傾陷桂林尙係欲圖卸過先發制人與伍佾無異而宋元俊熟悉番情尙可用其所長俟功過將來相抵今既審出各種情節竟是一奸狡負恩之人豈可復行姑息貽誤大事宋元俊汪承霈均著革職拏問同桂林一併解赴行在候訊再行降旨至王萬邦初爲宋元俊所愚一經詰訊卽吐實情此案得以明確其情尙屬可原且伊領兵打仗頗爲勇往著從寬免其革職治罪仍在軍營領兵以勵後效知州曹焜同知林儒議取賞號銀兩雖未實用亦屬輕舉妄動曹焜林儒著革職仍交文綬阿桂差委俟軍務告竣再行奏聞明亮鐵保汪騰龍前已降旨革職鐵保仍遵前旨留於軍營自備資斧效力贖罪其成都副都統員缺已令書景阿補授並令馳驛卽赴南路軍營代鐵保管領滿洲官兵事務明亮著賞給頭等侍

衛銜汪騰龍著賞給參將銜均自備資斧帶兵前往綽斯甲布督同都司李天佑駕馭該土司等進勦金川至於綽斯布甲一路進兵甚爲緊要李天佑雖諳番情但係都司未必爲番人畏服明亮汪騰龍初至其地恐亦不能卽與相習著阿桂於南路軍營大員內熟籌一明曉番地情形者令其同往以資控馭○戊子諭軍機大臣等前據阿爾泰朱元俊參奏桂林各款彼時以阿爾泰老成篤實所劾自非虛飾桂林如果乖張謬妄至此卽應審明立冀重典曾經宣諭中外並將原摺發鈔特派福隆安前往查審茲據福隆安審明原參最重如造屋居住實係貯米板屋三間軍營相聚酣飲亦無其事質之在營將弁等眾口一詞阿爾泰在旁聽聞惟稱原參係朱元俊開給我實未能深知至發銀向金川贖人一欸訊係司官汪承需等聞布拉克底巴旺代覓綠旗迷失之兵應

加賞號卽向軍需局取銀五百兩交王萬邦備賞其取銀月日實在金川未經送人到營之前乃宋元俊於福隆安未到時豫屬王萬邦附會原參供作向金川贖人並教令王萬邦捏寫字札宋元俊亦給覆札彼此執以爲據且向王萬邦言我若不參桂林俟陝甘兵三千全到必令我帶往進剿若不去彼必參我怯懦經王萬邦供吐明確宋元俊亦自認不諱業已畫供後復向人言若再問我卽行抹脖子等語初據福隆安奏到查審大槩情形以宋元俊不過因墨壘溝失事一節桂林曾派其救援恐爲桂林所劾故爲先發制人之舉與伍岱無異但伊熟悉番情尚可留其在營帶兵俟事竣後功過相抵今復據福隆安奏到宋元俊各種情節不但其存心陰險惟以傾陷爲能亦且行同無賴而其不知威奮畏懼帶兵止圖自顧全不以國事爲念真是喪盡天良斷不可留其在營

債事已傳諭將朱元俊革職尋問解行在審訊昨又據福隆安奏已令其帶兵往綽斯甲布朕以其人已不足信帶兵實屬非宜若已起程在途前旨暫留不發俟其辦理稍有頭緒再爲覈定但宋元俊居心如此實爲可惡豈宜令其復擁貲財保妻子聞其係安徽懷遠縣人著傳諭高晉卽速查明密派妥幹大員馳赴宋元俊原籍查伊田地房屋若干其父母是否尙存妻子或在本地居住抑係隨任逐一查明覆奏但此案尙未明降諭旨高晉辦此止須查點明確密爲看守以防寄匿不必照查抄家產之例卽行抄沒將此由四百里傳諭高晉知之○辛卯諭侍郎劉秉恬見在差往四川辦理西路軍營糧運事務著給與欽差大臣關防劉秉恬見已起程由陝西一路赴川該部由驛齎交○諭軍機大臣等據袁守侗等奏審擬朱一深揭報各上司婪索一摺已批交軍機大臣

會同行在三法司覈擬速奏矣至摺內稱查審朱一深所揭彭理各款或係挾嫌誣捏或係旁人撞騙俱訊非彭理入己等語前據彭寶等參劾彭理婪索朱一深銀物奏到時以彭理身為道員輒敢向屬員勒索情罪較重因將伊本旗家產查封今既審係虛誣其咎止於失察所有原封家產仍著給還該員在滇年久辦事尙可得力著仍留滇省遇有道府缺出酌量補用至額魯禮聽憑朱一深拜認門生向其索借銀兩法明傳爾瑚訥各收受朝珠短發價值俱係婪索入己自應按律定擬所有各該員本旗家產已交英廉查封其任所貲財並著李湖卽行嚴密查抄毋任絲毫隱匿寄頓並著李湖傳諭彭理伊既經訊明無罪卽將已封家產發還且加恩錄用額魯禮等賊款屬實卽令將各貲產查抄賞罰輕重悉視其人之自取朕惟一秉至公不存絲毫成見該員當益知感

激奮勉以圖自效至法明前已調任湖南臬司所有該員任所貲財卽著梁國治一體嚴密查抄如該員任所家屬已經回旗亦卽查明據實奏聞另辦將此並諭梁國治知之○湖廣總督海明卒予祭葬諡勤恪○以富勒渾爲湖廣總督巴延三爲陝西巡撫張鎮爲河南布政使由按察使遷○壬辰以廣德爲福建按察使由直隸口北道遷